

Hesus, Nos Fiel Ruman

Les 4 di kuartaal 1, aña 2022

Les a pa e siman aki:

: Lev. 25:25-27; Heb. 2:14-16; Heb. 11:24-26; 1 Kor. 15:50; Heb. 5:8, 9; Heb. 12:1-4.

TEKSTO PRINSIPAL:

"Asina anto, komo ku e yunan ta kompartí den karni i sanger, E mes tambe a tuma parti na e mesun manera, asina ku pa medio di morto E por a destruí esun ku tabatin poder riba morto, esta, diabel"(Hebreo 2:14, Beibel Santu).

Hesus, Nos Fiel Ruman

sabbat, 15-01-2022

Hebreo 1 ta papia di Hesus komo e Yu di Dios; e gobernante riba e angelnan, i "e resplendor di Su gloria i e representashon eksakto di Su naturalesa" (Heb. 1:3, Beibel Santu). Den Hebreo 2, Hesus ta e Yu di Hende, ku a wòrdu hasí menos ku e angelnan i ku a adoptá naturalesa humano ku tur su debilidatnan, asta na e punto di morto (Heb. 2:7). Den Hebreo 1, Dios ta bisa tokante di Hesus: "Bo ta Mi Yu"(Heb. 1:5, Beibel Santu). Den Hebreo 2, I Hesus ta referí na muchanan humano komo Su "rumannan" (Heb. 2:12).

Den Hebreo 1, e Tata ta deklará e Yu su soberania divino (Heb. 1:8-12). Den Hebreo 2, e Yu ta afirmá Su fieldat na e Tata (Heb. 2:13a).

Den Hebreo 1, Hesus ta e Señor divino, Kreador, Sostenedó, i Soberano. Den Hebreo 2, Hesus ta e Sumosaserdote humano, misèrikordioso i fiel.

Resumiendo, e deskripshon di Hesus komo un ruman fiel i misèrikordioso ta wòrdu representá den e deskripshon di e Yu komo e manifestashon prinsipal di e Dios Kreador etèrno (Heb. 1:1-4).

Studia e lès di e siman akí pa prepará pa Sabat, 22 di yanüari.

E Ruman Hòmber komo e Redentor

djadumingu, 16-01-2022

Lesu Levítiko 25:25-27, 47-49. Ken por a redemí un persona ku a pèrdè su propiedat òf su libertat pa motibu di pobresa?

E lei di Moisés tabata stipulá ku ora un persona tabata asina por ku e mester a bende su propiedat-òf asta e mes-pa e por sobrebibí, e lo risibí e propiedat ei òf su libertat bèk despues di sinkuenta aña, òf den e aña di hubileo. E aña di hubileo tabata un "gran" aña di Sabat den kua debenan tabata wòrdu pordoná, propiedatnan reklamá, i libertat proklamá na e koutivonan.

Sinembargo, sinkuenta aña tabata hopi largu pa warda. P'esei e lei di Moisés tabata stipulá tambe ku e famia di mas serka por paga e partí ku ainda tabata falta, pues, redemí su famia mas trempan.

E famia di mas serka tabata tambe esun ku tabata garantisá ku hustisia tabata wòrdu hasí den kaso di un asesinato. E tabata e vengadó di e sanger ku lo persiguí e asesino di su famia serka i kastig'é (Num. 35:9-15).

Lesu Hebreo 2:14-16. Kon Hesus i nos ta wòrdu deskribí den e porshon akí?

E porshon akí ta deskribí nos komo katibunan di diabel, pero Hesus komo nos Redentor. Ora ku Adam a peka, sernan humano a kai bou di e poder di Satanas. Komo resultado, nos no tabatin e poder pa resistí piká (Rom. 7:14-24). Pió ainda, tabatin sentensia di morto kual tabata rekerimentu di nos transgreshon i ku nos no por a paga (Rom. 6:23). Pues, nos situashon tabata parse di ta sin speransa.

Sinembargo, Hesus a adoptá nos naturalesa humano i a bira karni i sanger manera nos. El a bira nos famia di mas serka i a redemí nos. E no tabatin bergwensa pa yama nos "rumannan" (Heb. 2:11, Beibel Santu).

Paradoksalmente, tumando nos naturalesa i redemiendo nos, Hesus a revelá Su naturalesa divino tambe. den e Tèstament Bieu, e berdadero Redentor di Israel, nan famia di mas serka, ta Yahweh (p.e., Sal. 19:14, Isa. 41:14, Isa. 43:14, Isa. 44:22, Jer. 31:11, Ose. 13:14).

Kua ta e maneranan ku bo por siña pa eksperensiá e realidat di djis kon serka Kristu por ta di bo di un manera mas profundo? Di kon ta asina importante pa bo fe pa bo tin e eksperensia akí?

No tin Bergwensa pa Yama Nan Rumannan

djaluna, 17-01-2022

Hebreo ta bisa ku Hesus no tabatin bergwensa di yama nos Su rumannan (Heb. 2:11). Apesar di ta un ku Dios, Hesus a brasa nos komo parti di Su famia. E solidaridat akí ta den kontraste ku e brongosamentu publiko ku e lesadónan di Hebreo a sufri den nan komunitatnan (Heb. 10:33).

Les a Hebreo 11:24-26. Na ki manera e desishon di Moisés ta un ehèmpel di loke Hesus a hasi pa nos?

Bo a imaginá kiko e tabata nifiká pa Moisés wòrdu yamá "e yu di fárao su yu muhé"? E tabata un figura poderoso den e emperio di mas poderoso den e tempu ei. El a risibí e entrenamentu sivil i militar di mas haltu i a bira un personahe remarkabel. Esteban ta bisa ku Moisés tabata " 'di poder den palabra i echo' " (Ech. 7:22). Ellen G. White tambe ta bisa ku e tabata "un favorito serka e ehérsitonan di Egipto" i ku fárao "tabata determiná pa hasi su nietu adoptive su susesor riba e trono" (wak Patriarchs and Prophets, p. 245). Tòg Moisés a bandoná tur e privilegionan akí ora ku el a skohe pa identifiká su mes ku e israelitanan, un nashon di katibu sin edukashon i poder.

Les a Mateo 10:32, 33; 2 Timoteo 1:8, 12; i Hebreo 13:12-15. Kiko Dios ta pidi di nos?

Esaki tabata partí di e problema pa e lesadónan di Hebreo. Despues di a sufri persekushon i rechazo, hopi di nan a kuminsá sinti bergwensa di Hesus. Pa medio di nan aktonan algun tabata den peliger di pone Hesus "na bergwensa publiko" na lugá di honr'E (Heb. 6:6). Pues, Pablo konstantemente ta bisa e lesadónan pa "tene duru" na e "konfeshon" di nan fe (Heb. 4:14, Heb. 10:23, Beibel Santu).

Dios ke pa nos rekonosé Hesus komo nos Dios i nos ruman. Komo nos Redentor, Hesus a paga nos debe; komo nos ruman, Hesus a mustra nos e kaminda ku nos mester biba pa asina nos por "bira conforme e imagen di Su Yu, pa E por ta e primogénito den hopi ruman" (Rom. 8:29).

Pensa un ratu riba e desishon ku Hesus mester a tuma pa e por aseptá nos komo "rumannan." Di kon loke Hesus a hasi ei tabata rebahá Su mes muchu mas tanto kompará ku loke Moisés a hasi, i kiko esaki ta siña nos tokante di Dios Su amor pa nos?

Karni i Sanger Manera Nos

djamins, 18-01-2022

Hebreo ta bisa ku Hesus a adoptá nos naturalesa humano pa asina E por a representá nos i por a muri pa nos (Heb. 2:9, 14-16; Heb. 10:5-10). Akinan tin e fundeshi di e plan di salbashon i nos úniko speransa pa bida eterno.

Les Mateo 16:17, Galationan 1:16, 1 Korintionan 15:50, i Efesionan 6:12. Na kua defisiensianan di naturalesa humano e porshonnan aki ta relatá e ekspreshon di "karni i sanger"?

E ekspreshon "karni i sanger" ta enfatisá e debilidat di e kondishon humano (Efe. 6:12); i falta di komprondementu (Mat. 16:17, Gal. 1:16), i sumishon na morto (1 Kor. 15:50). Hebreo ta bisa ku Hesus a bira manera Su rumannan "den tur kos" (Heb. 2:17). E ekspreshon akí ta nifiká ku Hesus a bira kompletamente humano. Hesus no simplemente tabata "parse"; òf "aparentá di ta" humano; realmente E tabata humano, realmente un di nos.

Sinembargo, Hebreo ta bisa tambe ku Hesus tabata diferente for di nos pa loke ta trata piká. Na promé lugá, Hesus no a kometé niun piká (Heb 4:15). Na di dos lugá, Hesus tabatin un naturalesá humano ku tabata "santu, inosente, sin mancha, separá for di pekadornan" (Heb. 7:26). Nos tin tendensianan malu. Nos sklabilitut na piká ta kuminsá profundó den nos propio naturalesa. Nos ta "di karni, bendí komo esklabu na piká" (Rom. 7:14; wak tambe Rom. 7:15-20). Orguyo i otro motivashonnan pekaminoso ta polushoná asta nos bon echonan. Sinembargo, Hesus Su naturalesa no tabata manchá pa piká. E mester a bai asina. Si Hesus lo tabata "di karni, hendí komo esklabu pa piká," manera nos, E tambe lo tabatin mester di un Salbador. Na lugá di esei, Hesus a bini komo un Salbador i a ofresé Su mes komo un sakrifisio "sin mancha" na Dios pa nos (Heb. 7:26-28, Heb. 9:14, Beibel Santu).

E ora ei Hesus a destruí e poder di diabel dor di muri komo e ofrenda sin piká pa nos pikánan, pues hasiendo pordon i rekonsiliashon ku Dios posibel (Heb . 2:14-17). Hesus a kibra e poder di' piká tambe dor di duna nos e poder pa biba un bida hustu pa medio di Su kumplimentu di e promesa di e aliansa nobo pa skirbi e lei den nos kurason (Heb. 8:10). Pues, Hesus a derotá e enernigu i efektivamente a libra nos pa asina nos por "sirbi e Dios bibu"(Heb. 9:14). Mientras tantu, Satanas su destrukshon final lo bini na e huisio final (Rev. 20:1-3, 10).

Unabes nos tin e promesa di viktoria pa medio di Hesus, di kon asina tantu nos ainda ta lucha ku piká? Kiko nos ta hasiendo robes, i mas importante, kon nos por kumisá biba di akuerdo ku e yamada ku nos tin den Kristu?

Perfekshoná Dor di Sufrimentu

djarason, 19-01-2022

Les a Hebreo 2:10, 17, 18 i Hebreo 5:8, 9. Kiko tabata e funshon di sufrimentu den Hesus Subida?

E apòstel ta bisa ku Dios a hasi Hesus "perfekto pa medio di sufrimentu." E ekspreshon akí ta sorprendente. E outor a bisa ku Hesus ta "e resplandor di Su gloria i e representashon eksakto di Su naturalesa" (Heb. 1:3, Beibel Santu) i ku E ta sin piká, sin mancha, sin fayó, i santu (Heb. 4:15, Heb. 7:26"-28, Heb. 9:14, Heb. 10:5-10). Esaki ta nifiká ku Hesus no mester a vense niun tipo di imperfekshon moral òf étiko.

Sin embargo, Hebreo ta bisa sí ku Hesus a pasa dor di un proseso di "perfekshonamentu" ku a prove'E e rekursionan pa salba nos. Hesus a wòrdu perfekshoná den e sentido ku E tabata ekipá pa ta nos Salvador.

1- Hesus a wòrdu "perfekshoná" pa medio di sufrimentu pa e por bira e Kapitan di nos salbashon (Heb. 2:10). Hesus mester a muri na e krus komo un sakrifisio pa asina e Tata por tabatin e rekursionan legal pa salba nos. Hesus tabata e perfekto ofrenda di sakrifisio, e úniko. Manera Dios, Hesus por a husga nos; pero pa motibu di Su sakrifisio, Hesus por salba nos tambe.

2. Hesus a siña obediensia pa medio di sufrimentu (Heb. 5:8). Obediensia tabata nesesario pa dos kos. Na promé lugá, obediensia a hasi Su sakrifisio aseptabel (Heb. 9:14, Heb. 10:5-10). Na di dos lugá, Su sufrimentunan a hasi ku E por a bira nos ehempel (Heb. 5:9). Hesus "a siña" obediensia pasobra nunca El a eksperensia esaki promé. Komo Dios, ta ken lo E tabata tin ku obedesé? Komo e Yu eterno, i unu ku Dios, hende tabata obedesé E komo e gobernador di e universo. P'esei, Hesus no a progresá for di desobediensia na obediensia, pero for di soberanía i dominion a sumishon i obediensia. E Yu eksaltá di Dios a bira e Yu obediente di Hende.

3. Sufrimentu a revelá Hesus komo un Sumosaserdote misericòrdioso i fiel (Heb. 2:17, 18). Sufrimentu no a hasi Hesus mas misericòrdioso. Kontrali na esei, tabata pa motibu di Hesus Su misericòrdia El a hasi Su mes boluntario pa muri na e krus pa salba nos na promé instante (Heb. 10:5-10; kompará ku Rom. 5:7, 8). Tòg, e realidat di Hesus Su amor di ruman a wòrdu ekspresá i revelá berdaderamente pa medio di sufrimentu.

Si e Hesus sin piká a sufri, nos, komo pekadornan, siguramente tambe lo sufri. Kon nos por siña pasa dor di e tragedianan di bida i na mesun momento haña speransa i siguransa for di Señor, kende a revelá Su amor na nos den maneranan asina poderoso?

E Ruman Hòmber komo Modelo

djaweps, 20-01-2022

Un otro motibu pakiko Hesus a adoptá nos naturalesa humano i a biba meimei di nos tabata pa E por ta nos ehèmpel, e úniko ku por modela pa nos kiko ta e manera korekto pa biba dilanti di Dios.

Les Hebrewo 12:1-4. Di akuerdo ku e apòstel, kon nos mester kore e kareda di e bida kristian?

Den e porshon akí Hesus ta e kulminashon di un lista largu di personahenan ku e apòstel ta proveé komo ehèmpelnan di fe. E porshon akí ta yama Hesus "e outor i kumplidó di fe" (Beibel Santu). E palabra griego archegos ("outor") por wòrdu tradusí tambe komo " pionero." Hesus ta e pionero di e kareda pasobra E ta kore dilanti di e kreyentenan. De echo, Hebrewo 6:20 ta yama Hesus esun ku "ta bai nos dilanti." E palabra "kumplidó" ta duna e idea di ku Hesus a mustra fe den Dios den e forma di mas puru posibel. E porsbon akí ta siña ku Hesus ta e promé ku a kore nos kareda ku éksito i ku E ta esun ku a perfekshoná e arte di loke ta nifiká biba pa medio di fe.

Hebreo 2:13 ta bisa: "I atrobe: 'Lo Mi pone Mi konfiansa den djE.' I atrobe: 'Mira, Ami i e yunan ku Dios a dunaMi.' " (Beibel Santu). Loke ta sosodiendo akinan ta ku Hesus a bisa ku E lo pone Su konfiansa den Dios. E referensia akí ta un alushon na Isaías 8:17, 18.

Isaías a papia e palabranan akí enfrentando un menasa teribel di invashon for di parti nort di Israel i Siria (Isa. 7:1, 2). Su fe tabata un kontraste na e falta di fe di Akaz, e rei (2 Reinan 16: 5-18). Dios a eksortá Akaz pa konfia den djE i pa pidi un señal pa E por libr'e (Isa. 7:1-11). Dios ya a primintié, komo un yu di David, ku lo E protehá Akaz manera Su propio yu. Awor, Dios yen di grasia a ofresé Akaz pa confirmá e promesa ei ku un señal. Sinembargo, Akaz a ninga di pidi pa un señal, i, na lugá di esei, a manda mensaheronan na Tiglat pileser, rei di Asiria, bisando, " 'Mi ta bo sirbidó i bo yu hòmber' " (2 Reinan 16:7, Beibel Santu). Ki tristul! Akaz a preferá di ta e " yu hòmber" di Tiglat pileser na lugá di e yu hòmber di Dios.

Sinembargo, Hesus a pone Su konfiansa den Dios i den Su promesa ku E lo pone Su enemigunan bou di Su pianan (Heb . 1:13; Heb. 10:12 , 13). Dios a hasi e mesun promesa na nos, i nos mester ker'E, meskos ku Hesus a hasi (Rom. 16:20).

Kon nos por siña pone.nos konfiansa den Dios si no ta pa hasi eskohonan diariamente ku ta reflehá e konfiansa akí? Kiko ta e siguiente eskoho importante ku bo mester hasi, i kon bo por sigurá bo mes ku e ta revelá konfiansa den Dios?

Mas Estudio:

djabierne, 21-01-2022

Hebreo 2:13 ta kontené e palabranan di Hesus na Su Tata papiando tokante di Su rumannan: "Mira, Ami i e yunan ku Dios a dunaMi"(Heb. 2:13, Beibel Santu). Patrick Gray ta bisa ku Hesus ta wòrdu deskribí akinan komo e wardadó di Su rumannan. E sistema romano di tutela impuberum a determiná ku na morto di nan tata, "Un tutor, hopi biaha un ruman hòMBER mayó, tabata bira responsabel pa e kuido di muchanan chikitu i nan erensia te ora ku nan yega e edat di madures, asina oumentando e deber natural di e ruman hòMBER mayó pa kuida pa su rumannan mas chikitu."-Godly Fear: The Epistle to the Hebrews and Greco-Roman Critiques of Superstition [Atlanta: Society of Biblical Literature, 2003], p. 126. Esaki ta splika di kon Hebreo ta referí na nos komo rumannan di Hesus i tambe komo Su yunan. Komo nos ruman hòMBER mayó, Hesus ta nos tutor, nos wardadó, i protector.

"Kristu a bini na e mundu, tumando humanidat i parando komo representante di hende, pa mostra den e kontroversia ku Satanas ku hende, manera Dios a kreanan, konektá ku e Tata i e Yu, lo por obedesé kada rekerimento divino."-Ellen G. White, Selected Messages, buki 1, p. 253.

"Den Su bida i lesnan, Kristu a duna un ehempel perfekto di e ministerio apnegá ku tin su orígen den Dios. Dios no ta biba pa Su mes. Kreando e mundu, I defendiendo tur kos, konstantemente E ta ministrando na otronan. 'E ta hasi Su solo sali riba mal hende i riba bon hende, i ta laga awa yobe riba hende hustu i riba hende inhustu." Mat. 5:45. E ideal di ministerio akí Dios a duna na Su Yu. Hesus mester a para na kabes di humanidat, pa asina pa medio di Su ehempel E por siña loke ta nifiká pa ministrá."- Ellen G. White, The Desire of Ages, p. 649.

Preguntanan pa Diskushon:

1. Hebreo ta bisa nos ku Hesus a bira nos ruman hòMBER pa E por salba nos. Pensa tokante di kiko ta nifiká loke Dios a hasi pa por salba nos. Di kon anto, si nos bira nos lomba pa un realidat asina asombroso lo ta un eror trágiko?
2. Di kon ta asina importante pa nos ku Hesus no a nanse "komo esklabu na piká" manera nos (Rom. 7:14)? Pensa riba Moisés, i di kon tabata importante pa e israelitanan ku E no tabata un katibu manera nan tabata. Kon e historia di Moisés, na un manera chikitu, ta yuda nos komprondé loke Hesus a hasi pa nos?
3. Meditá mas riba e ròl di sufrimentu den nos bida. Di kon nos no mester pensa nunca ku sufrimentu, riba su mes, ta bon, maske ku algun bia kosnan bon ta sali for di dje?